



## 佢个社群網站生日

有一日，佢收著國小同學阿惠寄來个電子郵件(email)，信个標頭寫等「重要个通知」，佢驚有開同學會个重要通知，就煞煞點開來睇，結果，點開來後，除忒一個申請社群網站个通知以外，麼个就無！佢疑狐異久，就先摻郵件關忒。過幾日，佢又想著這件事，有兜愁毋知係同學會个通知無？就再過摻這封信點開來，續等申請加入這個社群網站。加入以後，點落阿惠个網頁，就睇著幾張盡得人惜个小動物相片定定，無睇著其它个通知。佢心肝肚想，阿惠定著盡好畜小動物，佢正會摻相片傳分大家睇，講實在，這也摻佢原旦想个內容差忒多咧！經過這擺申請，佢變成這個社群網站个會員，但係，佢關忒網站以後，就毋識再過點入過。

一駁後，佢收著另外一個同學寄來邀請加入共個社群網站好朋友个電子郵件，毋過，佢早就毋記得自家係會員咧！就點入該隻社群網站申請加入，佢填好資料送出，就分打轉來，重填，又分打轉來，來來去去放勢申請幾下擺，還係分打轉來，佢想仰會恁奇怪？就試用佢个電子郵件直接登入，旨知一擺就成功，該下，佢正想起自家早就係會員咧！過後，慢慢有兜熟事个人會邀請佢加入做佢兜个朋友，佢睇著通知乜會登落網站來加入。因為佢係一個懶尸个會員，久久正登入一擺，所以，這個社群網站个設定摻個人資料佢通通毋識動過。一直到有一日，佢登入後，睇著有人留言祝福佢生日快樂，正發現自家在這個社群網站个生日係內肚設定个新曆正月初一。因爭這個網站有提供祝福朋友生日个功能，見到咧新曆元旦，佢就會接著朋友對佢生日个祝福，還有朋友講：「你係元旦嬰兒仔！佢乜係元旦嬰兒仔！偲俚下二擺愛共下在元旦來做生日喔！」阿姆哀！佢睇著盡毋像勢，驚人緊誤會佢个生日係在元旦，就煞煞摻網站个生日換做自家正經个生日，希望下二擺毋好再過過毋著生日。

見擺到元旦，佢睇著社群網站裡肚在這日生日个朋友總係比平常時還較多，佢就會煩勞，佢兜个生日正經係在元旦無？也係網站个生日設定毋識換過？佢愛摻這兜朋友祝賀生日快樂無？這隻問題佢還妄想真，恁久，新个愁慮又來！頭擺，網站朋友少个時節還毋多知，等朋友緊增加，收到个生日祝福乜緊來緊多，愛用來答謝大家个時間也緊來緊長，照理來講，祝福越多，愛越歡喜正著，仰般會變愁慮呢？佢想，這就係人情事務，朋友恁有誠意摻偲祝賀生日，自家仰做得失禮，定著愛一一來回字感謝正好。但係，這一來一去，時間做忒不少，又驚漏忒人，會敗勢，無想著到尾來，社群網站个生日嘎變做佢个難處。背尾，好得佢有尋著網站肚生日毋公開个功能，佢就暫時先點忒，希望之後自家恬恬過生日就好，毋過，佢有接著朋友生日通知个時節，還係會誠心誠意送出「生日快樂」个祝福。

作者：林伯殷

### ☆詞彙學習☆

【疑狐】ngi fu：懷疑。

【正經】zhin` gin`：真的。

【一駁】rhid` bog`：一段時間。

【見擺】gien` bai`：每次。

【放勢】fong` she`：盡全力。

【煩勞】fan lo：擔心。

【阿姆哀】a` me` oi`：我的天啊！

【愁慮】seu li`：憂慮。

【毋像勢】m ciong` she`：不對勁。

【人情事務】ngin cin sii` vu`：人情世故。